

ACTUALIZACIÓN DO MODELO DE CONTRATO-TIPO RELACIONADO COA REALIZACIÓN DE ACTIVIDADES DE DE I+D+i AO ABEIRO DO ARTIGO 83 DA LOU (E DOCUMENTOS DE USO INTERNO ASOCIADOS AO MESMO)

1. NORMATIVA APLICABLE

O artigo 3 do *Regulamento para a xestión de convenios na Universidade de Santiago de Compostela*, aprobado polo Consello de Goberno do 19 de decembro de 2002, establece a posibilidade de elaborar determinados modelos-tipo de contratos e/ou convenios para a súa aprobación polo Consello de Goberno previo informe dos servizos correspondentes, especialmente da Asesoría Xurídica da USC, co fin de facilitar a tramitación dos mesmos dentro da regulamentación establecida.

2. MOTIVOS DA RENOVACIÓN DO MODELO-TIPO DE CONTRATO PARA PROXECTOS DE I+D+i

A aprobación da *Lei Orgánica 4/2007, do 12 de abril (LOM-LOU)* que modifica a *Lei Orgánica 6/2001, do 21 de decembro, de Universidades (LOU)* da unha maior importancia á función da transferencia do coñecemento e da tecnoloxía á sociedade e indica a necesidade de desenvolver unha xestión eficaz da mesma co obxectivo de contribuir ao avance do coñecemento, do desenvolvemento tecnolóxico, a innovación e a competitividade das empresas e en xeral ao progreso económico e social no marco dun desenvolvemento sotible.

Igualmente, establece a importancia de fomentar a vinculación entre a investigación e o sistema produtivo como vía para articular o proceso de transferencia do coñecemento, e a posibilidade de que dita vinculación poida desenvolverse a través da creación de empresas de base tecnolóxica a partires da actividade universitaria, e máis concretamente a partir de patentes ou de resultados xerados de proxectos de investigación financiados total ou parcialmente con fondos públicos.

Os novos programas nacionais (como o CENIT) e outros internacionais permiten a realización de proxectos de I+D+i conxuntos nos que as universidades, especificamente, poden participar baixo contrato directo coa empresa (subcontratación) ou como socios das mesmas (proxectos en colaboración). Estas novas modalidades de colaboración levaron á elaboración de diferentes documentos e informes relacionados coa posible existencia de axudas de estado nas colaboracións entre empresas e centros públicos de investigación (*Marco Comunitario sobre ayudas estatales de Investigación y Desarrollo e Innovación, 2006/C 323/1*, publicado no DOUE do 30/12/2006) e mesmo comunicacións sobre unha mellor xestión e transferencia do coñecemento entre os centros públicos de investigación e a industria.

Nesta liña a *RedOTRI da CRUE* promoveu a implantación de boas prácticas na xestión dos dereitos de propiedade intelectual e industrial a seguir polos Centros Públicos de Investigación nas súas relacións coas empresas, e suxire unha serie de recomendacións a ter en conta nos procesos de negociación previos a relación contractual que se establece coas mesmas, e mesmo desenvolveu un modelo de contrato que recolle este tipo de recomendacións.

Polo tanto, a necesidade de aplicar unha xestión responsable e eficaz dos dereitos de propiedade intelectual e industrial que xurden na relación e fluxo de coñecemento

entre os centros xeradores do mesmo (como as universidades) e as empresas así como a obriga de cumprir cunha serie de compromisos asociados á confidencialidade da información transmitida e xerada na colaboración entre ambas partes levan á redefinición dalgúns aspectos sobre a materia que non quedaban recollidos no actual modelo-tipo de contrato.

Polos motivos expostos preséntase un novo ***Modelo-tipo de contrato para a realización de proxecto de I+D+I entre [empresa] e a Universidade de Santiago de Compostela.***

Asociado co referido modelo, e co obxecto de asegurar o cumprimento por parte da USC dos compromisos adquiridos respecto á confidencialidade da información na relación contractual que se establece coa empresa por unha banda e de cesión da titularidade naqueles casos de propiedade intelectual (fundamentalmente para aqueles desenvolvementos realizados na área TIC) inclúense uns modelos de acordos internos que faciliten a xestión.

Por último, preséntase un modelo de acordo interno que defina os dereitos e obrigas en materia de propiedade industrial e intelectual así como de confidencialidade daquel persoal que traballa ou colabora en actividades de investigación e que non ten ningunha vinculación funcional ou laboral coa USC, como poden ser bolseiros ou investigadores visitantes

3. DOCUMENTACIÓN PRESENTADA

Preséntanse o seguinte modelo-tipo (na súa versión en castelán):

Modelo-tipo de contrato para la realización de proyecto de investigación y desarrollo entre [empresa] y la Universidad de Santiago de Compostela

Asociado ás obrigas adquiridas pola USC neste tipo de contratos, preséntanse os seguintes acordos internos (na súa versión en castelán):

- ***Compromiso de confidencialidad del personal participante en el proyecto***
- ***Confidencialidad y Cesión de propiedad intelectual (por parte del personal participante en el proyecto)***

Estos dous documentos non son modelos-tipo que encaixen no *Reglamento de Convenios da USC*, se non compromisos e obrigas asociados ao desenvolvemento dun proxecto baixo o modelo-tipo de contrato presentado.

Finalmente, co fin de regulamentar a colaboración e/ou participación nun proxecto, calquera que sexa o financiador, daqueles investigadores sen vinculación laboral ou funcional coa USC, preséntase (na súa versión en castelán)un:

- ***Modelo de documento para firmar por todas las personas sin vinculación laboral o funcional con la universidad y vayan a participar en el proyecto (confidencialidad y cesión de derechos a la USC)***

Igualmente non se trata dun modelo-tipo que encaixe no *Regulamento de Convenios da USC*, se non dun compromiso para coa USC do persoal sen vinculación coa mesma

4. BREVE EXPLICACIÓN DAS CARACTERÍSTICAS DE CADA DOCUMENTO

Modelo-tipo de Contrato para la realización de proyecto de investigación y desarrollo entre [empresa] y la Universidad de Santiago de Compostela

No mesmo quedan resaltadas (con distinta cor ou enmarcadas) as variacións con respecto ao anterior modelo-tipo (que foi aprobado polo Consello de Goberno do 19 de febreiro de 2003).

Inclúense:

- As obrigas económicas por parte da empresa unha vez aceptado/s o/s informe/s dos traballos realizados e presentados, de xeito que a USC poda requerir legalmente o pago dos traballos realizados.
- As obrigas en canto á confidencialidade da información intercambiada e xerada no proxecto por parte da USC e do Investigador Responsable, e polo tanto de todos os investigadores e persoal implicado no proxecto.
- A diferenciación clara en canto a propiedade industrial (relacionada coas patentes) e sobre a propiedade intelectual (fundamentalmente no que se refire a programas de ordenador, software,...) xa que a súa lexislación é diferente.
- As posibles opcións para un mellor tratamento e negociación en canto á titularidade e propiedade (industrial e/ou intelectual) dos resultados, a súa posterior explotación comercial e a utilización, de ser o caso, da información (coñecementos) previos que son propiedade da USC.
- Inclusión de determinados aspectos relacionados co cumprimento da lexislación en materia de protección de datos, riscos laborais, responsabilidade civil ou aspectos éticos que non estaban recollidos no anterior modelo.

Compromiso de confidencialidad del personal participante en el proyecto

Para o cumprimento das obrigas de confidencialidade asumidas pola USC, e o *Investigador Responsable* do proxecto (que se indican na Cláusula Oitava e no Anexo 3 do Modelo-tipo de contrato), é requisito que todos os investigadores e persoal relacionado coa execución do proxecto sexan coñecedores dos termos recollidos no contrato en canto a Confidencialidade da Información, polo tanto neste modelo recóllese o compromiso dos mesmos para respectar ditas obrigas.

Confidencialidad y Cesión de propiedad intelectual (por parte del personal participante en el proyecto)

Nos casos nos que o traballo de investigación dea lugar a resultados que caen no ámbito da Lei de Propiedade Intelectual (como os relacionados cos programas de ordenador, software específico,), e no caso de que o contrato asinado coa empresa reflicte unha cesión por parte da USC dos dereitos dos mesmos á mesma (ver Cláusula Novena, Parágrafo 9.4 - Opción 2), é necesario que os “autores” (investigadores implicados) cedan os dereitos de explotación da obra (produto) á USC para que ésta poda cumprir coas obrigas do contrato (sinalar que os dereitos morais como autor da obra/produto se respectan ao igual que ocorre co recoñecemento dos “inventores” para os casos de patentes/dereitos de propiedade industrial).

Ao mesmo tempo, o investigador asume o compromiso de confidencialidade respecto da información intercambiada e xerada na relación coa empresa (como no modelo anterior).

Modelo de documento para firmar por todas las personas sin vinculación laboral o funcional con la universidad y vayan a participar en el proyecto (confidencialidad y cesión de derechos a la USC)

É moi usual a colaboración de persoal investigador procedente doutras institucións sen ningún tipo de vinculación laboral ou funcional coa USC que ten acceso a moita información sobre as investigacións que un grupo da USC poda estar realizando, ben sexa en colaboración ou baixo contrato con empresas ou mesmo aquela financiada con fondos públicos a través de convocatorias competitivas.

O mesmo está a ocorrer cos bolseiros para os que non existe relación laboral coa USC, e que moitas veces incluso están sendo financiados con cargo a actividades de I+D+I baixo contrato con empresas ou mesmo convenios con outras administracións públicas.

Nestas situacións existe un baleiro legal nas que o grupo investigador, e polo tanto a USC, pode ver afectadas determinadas liñas de investigación pola publicación ou apropiación da información e coñecementos aos que dito persoal ten acceso.

Co fin de evitar este problema pero ao mesmo tempo recoñecendo o labor realizado por dito persoal colaborador ou en formación no desenvolvemento dunha investigación determinada, o documento presentado regula os compromisos tanto da USC para co persoal sen vinculación como deste para coa USC.